

Comunicado di MEP

Ing. Edison Briesen tabata un politico ehemplar cu a sirbi su pais como minister y parlamentario



ORANJESTAD — Dialuna dia 28 di october tabata e ultimo biaha cu bo ta mira Ing. Edison Briesen den Parlamento di Aruba. Eddie ta bandona Parlamento pa asina Glenbert Croes por drenta den e fraccion nobo di Parlamento. Eddie ta un politico ehemplar, un politico cu a demostra lealtad den su partido den bon tempo y den mal tempo. Despues di a termina su estudio di Ingeniero 1978 na Hulanda, el a regresa Aruba, como empleado publico cu e tarea specifico di reorganisa

Transporte Publico. Gobierno di MEP e tempo ey a presenta un plan y proyecto di Aruba Bus Company, awe Arubus y a haya financiamiento pa inicia e proyecto aki. Na 1982 Eddie a wordo nombra como director di Arubus. Na aña 1983 Eddie a wordo acerca pa MEP pa postula su mes ariba lista pa eleccion di eilandsraad 1983, inicio di su carera politico. Eddie a bira miembro di parlamento den e prome gabinete Oduber na januari 1989 y despues cu Sr. Daniel Leo a fayece, Eddie a wordo nombra na augustus



1989 como Minister di asuntonan Economico y Turismo te cu gobernacion di Gabinete Oduber 2. For di 1994 te cu 2001 Eddie tabata miembro di Fraccion di MEP den Parlamento den oposicion. Y na momento cu MEP a drenta gobierno bek cu Gabinete Oduber 3 y 4 Eddie Briesen a keda nombra como Minister di Turismo y Transporte. Desde 2009 Eddie tabata den fraccion di MEP den oposicion y desde 2011 Eddie ta lider di fraccion di MEP y Secretario general di Partido MEP, un man drechi di lider di partido. Eddie a ocupa varios otro funcion, entre otro miembro di Hubentud Pro MEP, Chairman of the Board of Directors

of Aruba Investment Bank (AIB), Chairman Marcultura, Chairman Caribbean Tourism Organization (CTO), Miembro Parlatino, Miembro Com. UN World Tourism Organization (WTO) / Com. Sustainable Development, Miembro di Parlamento di Aruba pa MEP.

MOTIVACION PA DRENTA POLITICA

“Saliendo for di un famia grandi (14 ruman) y humilde unda e espirito di solidaridad, union familiar, na unda grandinan mester percura pa e chikitinnan y esunnan fuerte mester percura pa esunnan menos fuerte, ta forma e fundeshi solido cu ta sostene e famia. E mesun caracteristicanan aki e partido prestigioso

MEP ta brinda. Democracia, Husticia, Solidaridad y Igualdad ta e base pa un comunidad sano, digno y fuerte. Pa e motibonan aki semper MEP”, segun Eddie Briesen. Despues di un carera politico impresionante di 30 aña, Eddie ta retira di Parlamento cu honor. Pero Eddie no ta retira di politica activo. Eddie ta sinti e compromiso cu su pais, y lo sigui cu un papel activo den Partido MEP, como consehero di lider y e parlamentariano. Eddie, den nomber di e gran famia di MEP y pueblo di Aruba en general nos ta yama bo DANKI pa tur locual cu bo a duna na nos partido y na nos pais. □